

EDITORIAL

Pandayen ti pigsa ti umili iti tengnga ti nakaro a krisis iti pulitika ti rehimen US-Marcos

Daydayyegen ti nakaro a krisis iti pulitika ti rehimen Marcos. Daytoy ket kasaruno ti panangibutaktak ti sigud nga alyado ken babaunen na iti konggreso a ni Marcos mismo ti adda iti tuktok ti dakkel a burukrata kapitalista a sindikato iti gubyrno a mangkolkolekta ti kikkak ken pasuksok iti ginasut a bilyon a piso a proyekto nga imprastruktura. Daytoy a panagibutaktak ket saan a nakakigtotan ti umili, ngem ad-adda a rinubroban daytoy ti umap-apoy a pungtot da iti engrande nga iskema ti korapsyon ken panagtakaw ni Marcos iti pondo ti umili.

Gapu ta isuna ti linipit ken iten-tenag ni Marcos, nagsarita ni dati a kongresman Zaldy Co a mismo a ni Marcos ti nagmandar kenkwana, kas pangulo ti komite iti badyet iti kongreso, nga agisingit ti ₱100-bilyon a proyekto iti badyet ti 2025. Inbunannag na nga isuna mismo ti nagipan ti male-maleta a kikkak iti balay ni Marcos ken idia Ma-lacañang.

Kapada daytoy iti immuna a testimonya iti senado ni Roberto Bernardo, sigud a nangato nga upisyal ti Department of Public Works and Highways (DPWH) a binilyon a piso a kikkak kadagiti proyekto a pang-imprastruktura ti indeliber na kadagiti kangrunaan nga upisyal ti Malacañang.

Sinakyan dagiti lider ti Iglesia ni Cristo ti nalawa a tignay protesta laban iti korapsyon. Binunag da idia Luneta dagiti parokyano da tapno agpakitang-gilas ken ballaagan ni Marcos a saan a lipiten dagiti negosyo daytoy a naibunannag a kasosyo dagiti Discaya

iti naanomalya a proyekto. Simmakay met dagiti Duterte ken dadduma a naka-aalyado da a kontra-Marcos a bunggoy tapno agiyaramid ti rali tapno mangsugsog kadagiti upisyal militar a tallikudan ni Marcos.

Iti desperado a gandat a dalusan

ti kapitpitak a rupa ni Marcos, parparwaren na tatta nga awan ti ammo na iti binilyon a piso a kikkak a maip-ipan idia palasyo, ken inaramat laeng dagiti asideg nga upisyal na ti nagan na. Iti pannakataranta na, dara-daras nga inikkat na ti kangatwan nga upisyal ti gabinete, kalihim iti badyet ken sumagmano a kangrunaan nga upisyal, banag a mangnaynayon ken mangpapau-neg kadagiti lamma iti bunggoy a Marcos.

Makarkarattot tatta ti Malacañang nga ilemmeng ti kas bantay a buntuon ti kwarta a kinurakot ni Marcos iti pondo ti pagilyan.

Kabadang na ti sumagmano a grupo kas ti Akbayan nga agpospostura a kontra-korapsyon ngem mangisaksakit kenkwana babaen ti



panagkwestyon iti panangibutaktak a mismo a ni Marcos ket sangkot ken ulo iti panagkurakot. Pammutbuteng da ti posibilidad a sumublat ti kapada a bulok a ni Sara Duterte tapno lapdan ti panawagan ti umili a gibusanen ti rehimen US-Marcos.

Agbuybuya ti imperyalista nga amo ni Marcos. Babaen ti kontrol daytoy iti AFP, agtaltalinaed a sibubukel ti suporta ti US ken Marcos. Awit daytoy ti linya nga iskema ti China ti "destabilisasyon" laban ken Marcos. Nu pay kasta, nakasagana daytoy nga iyakar ti suporta na iti sabali a paksyon nga agtultuloy a mangitantandudo iti interes iti ekonomya, pulitika ken militar ti US iti pagilyan. Nairut daytoy a nakasilpo ken agit-ited ti pondo iti grupo nga Akbayan kas reserba a kabalyo daytoy, uray pay agtaltalinaed nga opsyon nga ipatugaw ti paksyon nga ad-adda a militarista, nangruna tapno direkta a pawilan ti pumigpigma a progresibo ken patriyotiko a tignay masa.

Saan a sumarsardeng ti ayus dagiti protesta a kontra-korapsyon. Agtultuloy ti *walkout* ken tignay-protesta dagiti kabataan estudyante iti nadumaduma a paset ti pagilyan. Tumataud ti nalawa a tignay dagiti mngmangged, dagiti nakurapay iti

komunidad ken nadumaduma a demokratiko a dasig ken sektor. Pasis-ta a kinaranggag ken pammutbuteng ti isabsabat ti rehimen Marcos tapno apputen ti pumigpigma a timek ti umili.

Inton Nobyembre 30, aldaw ti pananglagip ken Andres Bonifacio, banwar ti Pilipino nga anakling-et, manamnama ti balbaliw a panaglayus ti umili tapno ipamatmat ti pungtot iti korapsyon. Umannurot iti awag a pagsungbaten ti amin a karaman iti korapsyon, pumigpigma ti pukkaw ti umili tapno padisyen wenno pagibbaten ni Marcos ken Duterte.

Sumaksaknap tatta ti panawagan tapno itakder ti maysa a "transition council" wenno konseho a pang-transisyon, a mangimaton iti estado ken mangisagana ti proseso iti panangitakder ti baro a gubyrerno. Pakakitaan daytoy ti nauneg a panakadismaya ken kinaawan ti talek ti nalawa nga umili kadagiti proseso a ligal ti agar-ari nga estado ken kadagiti nabotosan nga upisyal ti gubyrerno. Bayat a bumaybayag ti krisis ti agar-ari a sistema iti sidong ni Marcos, sigurado a pumigma ti konsesus ti nadumaduma a saray ti gimong a Pilipino para ditoy.

Daytoy a potensyal a konseho ket ipasngay ken iyuged ti proseo ti

panangpadisi iti rehimen US-Marcos. Nu magun-od, agbalin a baro a tay-ak daytoy ti dangadang para kadagiti tartarigagayan a panagbalbaliw. Rumbeng nga irupir ti umili ti demokratiko a representasyon laban iti dominasyon dagiti agar-ari a dasig. Ti pigsa dagiti demokratiko a sektor a maipunpundar iti tignay a kontra-korapsyon ken burukrata kapitalismo ket agbalin a puonan kadagiti dangadang iti masangwanan.

Nu kasta, nakapatpateg a pagpigmaen ti umili a Pilipino ti organisado nga intar da ken ti nalawa a tignay protesta tapno padisyen da Marcos ken Duterte. Napateg ti mano a daras pay a panagregta ken panaglawa ti pannakipaset ti masa a mangmangged, nakurapay iti syudad ken mannalon iti kaaw-awayan, a makapadpadas ti kakarwan a basnut ti korapsyon. Daytoy ti sigurado a mangdayyeg iti panagari ni Marcos. Dakkel ti karit kadagiti estudyante nga agturong kadagiti pabrika, komunidad ken kaaw-awayan, tapno tumulong iti panangriing ken panangpatignay iti minilyon nga umili.

Ingato ti kamulatan ti umili iti naindasigan a panagamiris iti malakolonyal ken malapyudal a sistema ti kagimongan iti Pilipinas. Kasapul-an a paunegen ti istorikal a kaamwan iti panaglaban ti umili iti bulok a reaksyunaryo nga estado ken ti pagkasapulan para iti rebolusyonaryo a dangadang tapno naan-anay a baliwan ti sistema.

Bin-ig a nakasaysayaat ti sitwasyon para iti Partido ken kadagiti rebolusyonaryo a pwersa. Nasken a gammatan ti gundaway tapno pagpigmaen ti Partido ken dagiti kabadang daytoy a limed nga organisasyon ti masa, tapno agserbi a landok a bugas ken natibker a balangkas ti naunday a dangadang. Rumbeng a pagpigmaen ti panawagan nga agturong iti kaaw-awayan tapno idia nga agtultuloy nga ipundar ti organisado ken armado a pigsa ti umili, ken itukit ti bin-i ti gubyrerno ti umili ken ti nawaya ken demokratiko nga urnos.



Tawen LVI No. 22 | Nobyembre 21, 2025

Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tayo.

Linaon

Editorial: Pandayen ti pigsa ti umili iti tengnga ti nakaro a krisis iti pulitika ti rehimen US-Marcos 1

Marcos, Duterte, pagib-ibbaten da iti pwesto	3
5,500 estudyante, nag-walk-out idia Baguio City	4
Organisasyon iti Hacienda Luisita, napatibker	4
Dagiti protesta	4
Panagtakaw, ramut ti didigra idia Cebu	5
Layus ti korapsyon tunggal didigra	6
Iti ababa a sarita	7
Damag ti DRU dumandanon agingga France	8
Asembliya ti KM idia Metro Manila, naiyaramid	8
Tuso a papairtengen ti US ti pannakibiang na	8
Anti-pyudal a dangadang idia Isabela	9
Organisador ti mannalon idia Isabela, naaresto	10
Aset, napatay ti NPA idia Negros	10
Armado a risiris ken henosidyo idia Sudan	10

Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan

 ang.bayan@cpp.ph

Marcos, Duterte, pagib-ibbaten iti pwesto

Napinget nga iyaw-awagen ti Bagong Alyansang Makabayan (Bayan) ti panagibbat iti poder ni Presidente Ferdinand Marcos Jr ken Bise Presidente Sara Duterte gapu iti pannakairaman da iti nasaknap a korapsyon iti gubyrno. Inpetteng ti alyansa a kas ari ken reyna ti korapsyon, isuda ket rumbeng a maikkat iti pwesto ken maibalud iti panagtakaw iti kaban ti pagilyan.

Dismayado ti umili a Pilipino gapu ta manon a bulan ti napalabas manipud idi nangrugi dagiti "imbestigasyon" ket awan pay laeng ti napagsungbat ken naibalud. Agtitinudo dagiti karaman iti kunniber ken ar-aramaten da dagiti mismo nga ahensya ken komisyon ti gubyrno para iti nalawa a *cover-up*. Awan ti magungun-od a pudno a sungsubangan ken hustisya agingga nga adda iti poder da Marcos ken Duterte.

Idurduron ti Bayan ti panangbuangay ti maysa a "transition council" a sumukat iti panangimaton iti gubyrno ken mangitandudo iti interes ti umili a Pilipino nu maikkat dagiti dadaulo a kunniber. Ti konseho ket buklen dagiti grupo a mangibagbagi kadagiti demokratiko a sektor a nangiyuna iti tignay kontra korapsyon ken tignay a mangpapanaw kadagiti Marcos ken Duterte.

Dagiti pasabog ni Zaldy Co

Nangnayon iti unget ti umili ti pasabog ni dati a Rep. Zaldy Co a direkta a mangitudtudo ken Marcos kas upisyal nga addaan kadakkelan nga "insertion" iti badyet para iti 2025. Kunana, minandar isuna ni Marcos nga agisingit ti ₱100 bilyon nga inkari kenkwana ti kasinsin ni Marcos a ni Martin Romualdez.

Nagiruar met ni Co ti listaan dagiti proyekto a napanan ti ₱100 bilyon a pondo nga inpasingit ni Marcos. Ti ₱81 bilyon ditoy ket nakalista para iti imprastruktura, nu sadinno nga 80% ket dagiti proyekto a *flood control*. Kunana, mangal-ala



ni Marcos ti 25% a kikkak kadagitoy a proyekto. Maysa ni Co ken dagiti kumpanya ti pamilya na kadagiti na-kaala ti ginasut a kontrata iti *flood control* ken dadduma pay nga imprastruktura.

Kalpasan ti pasabog ni Co, sinitante ni Marcos ti Executive Secretary na a ni Lucas Bersamin ken ti apo na a ni Adrian Bersamin, kasta met ti kalihim iti badyet a ni Amenah Pangandaman ken ti partner na nga *undersecretary* ti edukasyon a ni Trygve Olaivar. Dagitoy nga uppat ti intudo ni Co nga opereytor ni Marcos iti panangakop ti binilyon a kikkak.

Lumawlaw a panawagan para iti sungsubangan

Tuloy-tuloy dagiti dadakkel ken babassit a tignay a maisaysyangkat idia Metro Manila ken kadagiti prubinsya tapno umawag ti sungsubangan. Adu kadagiti aktibidad ket indauluan dagiti organisasyon a paset ti Kilusang Bayan Kontra Kurakot (KBKK).

Ginasut nga umili ti National Capital Region (NCR), kangrunaan manipud iti intar dagiti mangmangged ken nakurapay iti syudad ti nakikaykaysa iti Lakbayan ng Mamayan Kontra Korapsyon idi Nobyembre 7. Nagmartsa da agturong idia Metro Manila. Idia met laeng nga aldaw, dinarup ken kinalampag ti KBKK ti Office of the Ombudsman idia Quezon City. Nagprotesta da-

giti mangmangged iti salun-at iti nadumaduma nga ospital ken dagiti manursuro manipud iti 212 nga eskwelaan iti NCR. Nagtignay met dagiti mangmangged ken unyon idia Laguna.

Idi Nobyembre 14, maysa a martsa ti balbaliw a naisayangkat agturong idia Mendiola. Iti didia nga aldaw, adda met ti tignay iti pito a syudad idia Metro Manila, kasta met idia Pampanga, Cavite, Laguna ken kadagiti syudad ti Iloilo, Cebu ken Davao. Inyaramid met dagiti mangmangged, migrante ken estudyante ti STEM (Science, Technology, Engineering and Mathematics) ti koordinado a tignay idia nga aldaw. Dagiti mangmangged ket nagisayangkat met kadagiti "protesta a lumung-aw" kadagiti lugar a pagtrabtrabahuan da.

Idi Nobyembre 16, nasurok-kumurang 3,000 indibidwal ti timbambuno iti maikadwa a taray laban iti korapsyon iti UP Diliman. Maysa a konsyerto kontra kunniber ti nairuswat idia Angeles City, Pampanga iti didia nga aldaw. Iti agsasaruno nga aldaw manipud Nobyembre 17, nagisayangkat dagiti grupo ti mangngalap ti protesta iti igid-baybay ti Manila Bay.

Idi Nobyembre 17 ken 18, balbaliw a nagtignay dagiti agtutubo iti panangiyuna ti Youth Rage Against Corruption. Kabayatanna, idi Nobyembre 20, nagkakalampag ti grupo ti babbai idia Quezon City. AB

5,500 estudyante, nag-walkout idia Baguio City

Aggigiddan a nag-walkout ti 5,500 estudyante manipud iti Benguet State University, Saint Louis University- Maryheights Campus ken Main Campus, University of the Philippines-Baguio, University of the Cordilleras ken University of Baguio idi Nobyembre 18. Ti walkout ket paset ti pananglagip iti International Students' Day idi Nobyembre 17.

Dagiti kabataan-estudyante ket nagisayangkat ti programa kadagiti unibersidad da, kalpasan na ket nagmartsa da agturong idia Malcolm Square para iti maysa a sentralisado a programa. Kinundenar dagiti kabataan ti nasaknap a korapsyon iti gubyrno ken agtultuloy a kinaawan ti sungsubatan ken hustisya. Immawag da met ti nayon a badyet iti edukasyon ken kinundenar da ti "malification" wenno pribatisasyon ti pangpubliko a palengke ti Baguio ken panagminas dagiti gangannaet a kumpanya iti kabambantayan ti Mankayan.

Malaksid iti walkout idia Baguio City, nagisayangkat met ti istorikal a walkout ti 400 estudyante ti University of Eastern Philippines idia Northern Samar idi Nobyembre 17.

Idia Manila, ginasut a kabataan, iti panangiyuna ti Youth Rage Against Corruption (YRAC), ti nagmartsa agturong idia Mendiola. Adda met ti aktibidad ken protesta dagiti kabataan idia Tarlac, Pangasinana, Laguna ken Quezon, kadagiti syudad ti Cebu, Iloilo, Tacloban ken Davao. Kabayatanna, binabalaw dagiti grupo ti agsasaruno a bomb threat kadagiti unibersidad ken eskwelahan iti gandat nga idiskaril dagiti protesta da.

Iti Nobyembre 21, naituding nga isayangkat dagiti grupo ti kabataan ken estudyante ti maysa a nailyan nga aldaw ti walkout ken tignay. Timmakder dagiti estudyante nga agtultuloy da nga agtignay agingga nga awan ti mapagsungbat ken saan a maikkat iti pwesto da Ferdinand Marcos Jr ken Sara Duterte. Makipaset da iti Baha sa Luneta 2.0 inton Nobyembre 30.

AB

Organisasyon ti mannalon iti Hacienda Luisita, balbaliw a pinatibker

NAGSAPATA DAGITI baro a nabotosan a dadaulo ti Alyansa ng Manggagawang Bukid ng Asyenda Luisita (AMBALA) idi Nobyembre 16 iti maysa a taripnong idia Barangay Lourdes, San Miguel, Tarlac City.

Naigiddan daytoy iti taripnong tapno lagipen ti masaker idi 2004 a nakatayan ti pito a mannalon iti Hacienda Luisita iti panagpalto-paltog dagiti pwersa ti estado. Nakawelga idi ti United Luisita Workers' Union ken Central Azucarera de Tarlac Labor Union kas sungbat iti ilegal a pannakaikkat dagiti 326 nga unyonista. Ti welga ket sungbat met iti arig na adipen a pasweldo ti kumpanya, nga idi ket natennag ti ₱9.50 kada aldaw.

Kalpasan ti taripnong, nagmartsa dagiti mannalon kadagiti kalsada ti Tarlac City. Awit da dagiti awag para iti karbengan iti daga, pagbiangan ken panagindeg.

Iti asembleya da idi Nobyembre 15 ket nabotosan dagiti baro a dadaulo ti Ambala a dinar-ayan dagiti kameng manipud iti nadumaduma a barangay. Kaadwan kadagiti baro a dadaulo ket babbai. Baklay da tatta ti rebbengen iti panangsubbot iti balligi ti welga ti umili ken panangparegta ken panangpapigsa iti organisasyon.



Panangitabon ken Enrile iti Libingan ng mga Bayani, nasupyat. Pinullo nga organisasyon ken indibidwal ti nagipeksa ti panagsupyat da iti iske ma a panangitabon ken Juan Ponce Enrile iti Libingan ng mga Bayani inton Nobyembre 22. Ni Enrile ket kagurgura nga arkitekto ti linteg militar, mamapatay-tao ken mannibrong iti kalikasan ken kaban ti pagilyan. Pimusay isuna idi Nobyembre 13 iti edad a 101.

Protesta laban iti ilegal a panagikkat iti Calabarzon. Nagprotesta dagiti mangmanged manipud iti Pamantik-KMU iti batog ti National Labor Relation Commission iti Calabarzon idi Nobyembre 17. Ingiddan da daytoy iti panagdenggeg ti ahensya kadagiti kaso ti ilegal a panagikkat ti mangmanged iti Lazada, Shopee ken Coke.

Nagtuloy ti grupo iti upisina ti DPWH IV-A tapno kundenaren ti nasaknap a korapsyon kadagiti proyekto a pang-imprastraktura.

Silent protest dagiti manursuro ken empleyado iti CEU. Iti napalabas a lawlawas, nagikabit dagiti manursuro ken empleyado ti Centro Escolar University Faculty and Allied Workers Union iti kawkawes da kadagiti panawagan para iti disente a nayon sweldo, panangitandudo ti collective bargaining agreement (CBA) ken dadduma pay a karbengan dagiti manursuro ken empleyado. Sungbat daytoy ti unyon iti panagkedked ti administrasyon nga isakad ti maysa a nabagas a CBA para iti 2025-2030.

Tignay laban iti COP30. Nagmartsa dagiti grupo nga anti-imperyalista manipud Kalaw Avenue agturong embahada ti US idia Manila idi Nobyembre 15 kas pannakikaykaysa iti Global Day of Action for Climate Justice. Ti tignay ket paset ti internasyunal a kampanya laban iti 30th Conference of the Parties wenno COP30 a maang-angay idia Belem, Brasil. Ti COP30 ket pulong dagiti pagilyan a nagkari nga agtignay iti sango ti climate change.

Panaggamrud iti kalikasan ken kaban ti pagilyan ti pudno a magakapu iti didigra idiy Cebu

Daytoy Nobyembre, ti pagilyan ket binasnut ti agsaruno a bagyo a Tino ken Uwan. Nangitunda dagitoy ti nakaro a dangran iti agrikultura, imprastraktura, kabalbalayan kena eskwelaan. Nangkettel dagitoy ti adu a biag ken nangpadisi ti ginasut manipud kadagiti komunidad da.

Idiy Cebu, saan a bumaba iti 6,000 ti nadadael, bayat a 2,812 ti apagapaman a nadadael idi simmaplit ti bagyo a Tino idi Nobyembre 4. Nagsagrap ti nakaro a layus ken panagreggaay ti daga ti 40 a barangay. Dumanon iti atep ti napigsa a layus iti sumagmamano a subdibisyon a nangpatapaw iti pinullo a lugan. Sibubukel a balbalay ti naanud idiy Mandaue City, Danao City, Talisay City ken Liloan, kasta met idiy Consolacion ken Asturias.

Iti kabuklan, dumanon iti 232 nga indibidwal ti natay ken 112 ti mapukpukaw. Ti 158 a pimmusay ken 58 a mapukpukaw ket agtaud iti Cebu.

Napalabas ti mano nga aldaw, balbaliw a dinalapus ti bagyo Uwan ti isla. Nangitunda ti bagyo ti panagreggaay ti daga idiy Naga City ken pannakadadael dagiti imprastraktura idiy San Remigio, Medellin ken isla ti Caubian idiy Lapu-Lapu City.

Ti agsasaruno a trahedya ket saan laeng a bunga ti panagbaliw ti klima nu di ket resulta ti panaggamrud iti kalikasan ken iti kaban ti pagilyan dagiti agar-ari a dasig idiy Cebu ken iti pagilyan.

Narungsot a panagdadael iti kambantayan ken kabaybayan

Pinakaro ti nasurok dua a dekada a panagkwari iti nangato a paset ti kadagaan iti prubinsya ti panaglayus ken panagreggaay ti daga. Saan a bumaba iti 15 kumpanya ti agdama nga agiyar-aramid ti nalawa a panagkwari iti isla. Kadawyan a maminminas iti prubinsya ket *limestone*, *darat*, graba ken *dolomite* a mailaklako kadagiti kumpanya ti semento.

Maar-aramat dagitoy iti reklamasyon idiy Cebu ken Manila Bay.

Adda met ti saan a bumaba iti 12 proyekto a reklamasyon idiy Cebu City ken Lapu-Lapu City. Maysa kadagiti kadakkelan ti 235-ektarya a Cebu City Waterfront Reclamation Project. Idi 2024, naaprubaran ti nayon nga innem a mayor a proyekto a reklamasyon nga addaan kabuklan a 765 ektarya. Dinadael dagitoy a proyekto dagiti bakawan a sigud a nangsalaknib kadagiti komunidad iti baybay manipud iti napipigsa a bagyo, dalluyon ken layus. Sinerraan met daytoy dagiti natural a pagayusan ti danum.

Nayon a makagapu ti panagpegges ti layus ti awan konsiderasyon a panagitakder kadagiti proyekto a *real estate* ken turismo iti nangangato a paset ti Metro Cebu. Maysa ditoy ti The Rise iti Monterrazas de Cebu, maysa a nabarayuboy a pabalay a naiyukit iti igid ti bantay iti Cebu City. Siguden a namandaran ti Monterrazas nga isardeng ti proyekto kalpasan ti panaglayus ken panagreggaay ti daga kadagiti baryo ken iti baba a paset ti bantay.

Korapsyon kadagiti proyekto a flood control

Pinakaro dagiti palpak a proyekto a *flood control* kadagiti nababa a

paset ti isla ti panagpegges ti layus ken panagreggaay ti daga manipud iti nangangato a paset ti Cebu.

Segun iti datos ti estado, dumanon iti 343 ti proyekto para iti *flood control* idiy Cebu manipud 2016 agingga 2022, ken adda ti 168 a proyekto manipud 2023 agingga 2025. Nagilatang ti prubinsya ti ₱26.7 bilyon para iti 414 proyekto a *flood control* para iti tawen 2022 agingga 2025. Inaklon ti lokal a guberno nga amin a naitakder a *flood control* manipud 2019 ket palpak wenno *substandard*.

Kaadwan a nakaala ti kontrata idiy Cebu ti QM Builders ken Quirante Construction Corp. ti pamilya Quirante; Alpha & Omega ken St. Timothy Construction dagiti Discaya; Centerways Construction & Devt. Inc ni Lawrence Lubiano; Legacy Construction ni Alex Abelido ken WTG Construction & Development Corp. ti pamilya ni Sen. Bong Go.

Pungtot dagiti Cebuano

Nagprotesta dagiti biktima ti bagyo Tino manipud iti Barangay Paknaan ken Mandaue City ken kamkameng ti Bagong Alyansang Makabayan-Central Visayas idi Nobyembre 15 idiy Gorordo Avenue. Kinundenar da ti korapsyon iti prubinsya ken immawag da ti kumpensasyon para kadagiti naperdi. Nagngat da met ti kandila ken pinaaweng da dagiti kampanya kas pananglagip kadagiti pimmusay iti bagyo.

Idi Nobyembre 18, upisyal a binukel dagiti demokratiko a grupo ken sektor ti Kalihukang Sugboanon Kontra Korapsyon (KASUKKO) kas alyansa a kontra korapsyon idiy Cebu. Immawag ti alyansa iti umili a makipaset iti nailyan a protesta inton Nobyembre 30 idiy Fuente Osmeña, Cebu City. AB



Layus ti korapsyon ken panangidadanes iti dasig a mangmangged tunggal didigra

Tunggal lumned iti layus dagiti komunidad ken kalsada, doble ti epekto daytoy iti dasig a mangmangged. Masansan nga isuda ti agindeg kadagiti nababa ken malaylayus a paset dagiti syudad nu sadinno a naitakder dagiti palpak ken pagbagasan a proyekto a *flood control*. Saan laeng a maperperdi dagiti pagtaengan ken komunidad da, maaw-awanan da met ti sapul, maitentennag iti saan a natalged a kundisyon iti panagtrabaho ken agpegpeggad a maikkat da iti trabaho.

Kakarwan a madangdangran dagiti mangmangged nga agsusweldo ti nababa, dagiti kontraktwal, "self-employed," ken dadduma pay nga iti aktwal ket awanan trabaho ken mala-proletaryado. Isuda dagiti "no work-no pay," dandani awanan benepisyo ken awanan wenno addaan nakabassit nga urnong.

Maysa ditoy ni Carl nga agmaysa a mangisaksakad ti pamilya na. Nalayus ti balay na idi simmaplit ti bagyo a Tino idiy Cebu. Makalawas kalpasan ti bagyo, isuda nga agkakabsat ket saan pay laeng a nakasubli iti trabaho gapu iti panangasikaso iti nadadael a pagtaengan da. Naibusen ti sweldo na. Naibus metten ti 13th month pay a nasapa a naited ti amo na para koma iti Paskwa.

Makaunget isuna iti kasasaad a kasapulan na a mangala ti panggastos manipud iti nagrigatan na nga urnong bayat nga awan ti mapagsungsungbat kadagiti kurakot. "Nagrigat ti agbalin a biktima ti korapsyon," kunana. "Daytoy ket saan laeng a panagtakaw ti kwarta, panagtakaw met daytoy iti oras ken dignidad (mi a mangmangged)."

Idiy Balamban, Cebu, nakalasat iti layus ti *shipyard* ti Austal Limited, maysa a kumpanya nga Australian nga agim-empleyo ti 1,500 Pilipino. Ngem nasurok 40% dagiti mangmangged daytoy ti naglangan iti trabaho. Maysa ditoy ti *welder* a ni Rico nga agindeg iti paset ti Mandaue City a sibubukel a napunas idi nadadael ti dike ken pimmegges ti ayus ti danum ma-

nipud iti Butuanon River.

"Namaga ti *shipyard* ngem limned iti layus ti baryo mi," kunana. Naikkan isuna ti *emergency leave* ngem awan ti bayad na. Iti uppat nga aldaw a nakalangan isuna, napukawan ti ₱2,000 a sapul. Awan ti naawat na a tulong para iti rehabilitasyon manipud iti Austal ken iti gubyrno.


Pwersado a panagpatrabaho iti tengnga ti kalamidad

Inyulat ti BPO Industry Employees Network (BIEN) nga iti kangitingitan dagiti bagyo a Tino ken Uwan, pinwersa ti saan a bumaba iti 98 kumpanya a BPO dagiti empleyado da a sumrek iti trabaho.

"Nabagaan kami a sumrek ta nu saan ket makissayan ti bayad kadakami," salaysay ti maysa a *call center agent* iti Metro Manila. Timmapog isuna iti layus, naglugan ti dyip a nadadaelan iti tengnga ti byahe. "Saanak a nakaabot iti *shift* isu a napatulodanak ti *warning* iti *email*."

Makakatawa a makasangit laengen ti maysa pay nga empleyado a napilit nga *ag-work-from-home* iti tengnga ti nasaknap a *brown-out*. "Tallo nga aldaw nga awan ti naaramid ken awan sapul ko," kunana. Kasapulan nga agobertaym isuna nga awanan bayad tapno makamakam na ti kota na.

Idiy Bulacan, 200 babbai a mangmangged ti napwersa a sumrek idi Nobyembre 11 para iti "11-11 sale" wenno aldaw nga addaan diskwento dagiti kumpanya nga ag-



lallako iti internet. Kas iti dadduma, timmapog da iti layus tapno madanon ti pagtrabtrabahuan da a bodega.

"Makapaluksaw dagitoy nga istoriya ti panagrigat iti oras ti nakaro a didigra," segun iti Kilusan ng Manggagawang Kababaihan. Ipangpangruna pay dagiti dadakkel a kumpanya ti dakkel a ganansya ngem iti kinatalged dagiti mangmangged da."

Ti Bulacan ti sentro ti iskandalo dagiti naanomalya a proyekto a *flood control*, maikadwa ti Cebu.

Protesta a "lumung-aw iti layus ken korapsyon"

Idi Nobyembre 14, insayangkat ti Kilusang Mayo Uno ken ti saan a bumaba ti 10 unyon ti "protesta a lumung-aw manipud iti krisis ti layus ken korapsyon." Nakipaset ditoy dagiti mangmangged ti Nexperia, Wyeth, Vanson Paper, Regan, Himmel, PLDT, Kowloon House, 4E Builders ken dagiti mangmangged iti North Harbor ken First Cavite Industrial Estate.

Iti panagpegges dagiti dadakkel a layus, ad-adda a naiparang ti kinainutil ti gubyrno a Marcos a sungbatan dagiti kalamidad," pablaak ti KMU.

Idi Nobyembre 18, simmango iti midya dagiti mangmangged iti si-dong ti alyansa a Working People Against Corruption tapno iyanunsyo ti panagdar-ay ti dasig a mangmangged iti tignay idiy Luneta in-ton Nobyembre 30.

₱100 BILYON

ti segun ken Zaldy Co, dati a konggresista, ket inpasingit ni Marcos Jr iti badyet para iti 2025; 25% wenno ₱25B daytoy ket napan ken Marcos kas kikkak wenno "SOP".



1,800 klasrum ti nadadael gapu iti bagyo nga Uwan

1,182 ditoy ti parsyal a nadadael, 366 ti nakaro a nadadael ken 261 ti layon a nadadael. Naimaldit ti kadakkelan a danyos idia y Bicol, Calabarzon ken Cordillera Administrative Region.

₱550

pudno a gatad ti sweldo idi Oktubre, iti laksid ti nababa a tantos ti implasyon; saan latta a makagam-ud ti sweldo iti nangato a presyo ti taraon, gagatangen ken serbisyo.



₱13.60/litro ↑

panagtayok ti presyo ti *diesel* manipud Oktubre 15, iti uneg ti pito a lawas manipud umuna a lawas ti Oktubre; ₱9.60/litro ti ngimmatwan iti presyo ti gasolina ken ₱10.70/litro iti kerosin.

₱4.35 BILYON

gatad ti naanomalya a *flood control project* idia y Davao City a naipatungpal idi 2019-2022; 80 kadagitoy ket iti umuna a distrito ti Davao City.

Nagtaudan: ACT Teachers Partylist



₱5.1 BILYON

utang a saan a mabayadan ti 38 kooperatiba dagiti "moderno a dyip" idi 2024-2025, a makagapu ti panagserra da ken pannakapukaw ti pagbiagan ti ginasut a drayber.

242 pinatay a Palestino dagiti soldado nga Israeli idia y Gaza iti laksid ti *ceasefire* a nangrugi idi Oktubre 10.

Nagtaudan: Gaza's Health Ministry, Nobyembre 10, 2025

4% DIMMAKELAN TI GDP

iti maika-3 kwarto ti 2025, kabuntogan iti napalabas a 14 tawen; nagsuwek iti 4.1% ti panagdakkel ti *household consumption* (gastos dagiti pamilya), kababaan iti 15 tawen (saan a kabilang dagiti tawen ti pandemya).

Nagtaudan: Ibon Foundation

Dumandanon ti damag ti gubat ti umili ti Pilipinas agingga France

Tunggal dua a lawas, agtataripnong dagiti kameng ti Committee to Support the Revolution in the Philippines (CSRP), alyado ti Friends of the Filipino People in Struggle (FFPS) idia France, tapno agtalantan ti isyu ti Ang Bayan (AB). Paset daytoy ti regular a programa ti CSRP tapno pagadalan ken pasaknapen dagiti nagun-od ken panagabante ti gubat ti umili iti Pilipinas.

Segun iti Balita from FFPS, pagiwarnak pangmasa ti grupo, nagbalinen a regular nga aktibidad ti CSRP ti agpili ti napapateg nga artikulo iti AB ken panangituding kadagiti mangtalantan ditoy. Ipatpatarus da dagiti napili nga artikulo iti pagsasao a French kas paset ti panagsagana para iti panagadal. Adda ti nadumaduma a pamuspusan dagiti kakadwa tapno agsagana iti panagadal iti maysa nga artikulo," inpekta ni Ka Isaak ti CSRP. Kunana, idi damo ket nakatutok laeng dagiti kameng iti simple a panangipatarus iti artikulo, ngem idi agangay a nagbalin dan a mas komportable ket makait-ited dan kadagiti nayon a konteksto ken impormasyon.

"Kaspangarigan, agipakpakita da ti mapa tapno itudo ti lokasyon ti sumagmamano a syudad ken prubinsya, mangit-ited da ti nayon a detalye iti biag ti maysa a martir wenno ipalpalawag da ti pakasaritaan ti maysa nga organisasyon," segun ken Ka Isaak.

Nakita ti CSRP ti positibo nga epekto ti regular a panagtatalantan. Ngimato ti kumpyansa dagiti kameng a talantanen iti publiko ti rebolusyon a Pilipino ken ad-adda a maguyguyugoy da a makipaset iti trabaho iti internasyunal a pannakikinnabsat.

"Ti AB ket labes pay iti instrumento ti panangriing. Ti dadduma kadagiti makipaspaset iti diskusyon ket nagkamengen iti CSRP, ken tatta ket dumar-day dan kadagiti mobilisasyon mi," segun ken Ka Isaak. Agiwagwagayway dan ti bandera ti FFPS ken ti National Democratic Front of the Philippines ken nagiyebkas dan ti kinasagana a suportaran ti rebolusyon a Pilipino," kunana. **AB**

Asembliya ti KM iti Metro Manila, naisayangkat

NAGISAYANGKAT TI ASEMBLIYA ti maysa kadagiti balangay ti Kabataang Makabayan (KM)-Metro Manila Luzille Gypsy Zabala Brigade iti maysa a sikreto a lokasyon idi Nobyembre 16. Ti taripnong ket naiyaramid kas paset ti pananglagip iti maika-61 anibersaryo ti KM inton Nobyembre 30.

Natalantan iti asembliya ti nairut a rebbengen ti KM iti panangpapgisa ti tignay kabataan-estudyante iti sentro a syudad. Segun ken Ka Karso Mapagpalaya, maysa kadagiti dimmar-ay iti asembliya, nakasagana dagiti kabataan iti rehiyon a pangiggeman dagiti rebolusyonaryo a rebbengen ti KM.

Kunana, paayen ti KM dagiti pasista nga atake ti rehimen Marcos Jr ken tungpalen daytoy ti rebbengen ti pannakipaset ti kabataan iti armado a dangadang. "Nasken nga ipapuso ti tunggal kabataan ti ultimo a kinapateg ti KM iti panangiyabante ti rebolusyon a Pilipino!"

Pappapigsaen ti US ti tuso a pannakibiang iti tengnga dagiti didigra

Bayat a lumlumnad iti layus ti umili a Pilipino, makumikom ti US iti panangpairteng ti interbensyon militar daytoy iti pagilyan. Iti pannakibinadang ti aso-aso na nga Armed Forces of the Philippines (AFP), inaramat daytoy a kalub ti HADR (*humanitarian assistance and disaster response*) tapno tuluy-tuloy a makaisayangkat ti *war games* ken dadduma pay nga aktibidad militar.

Agtaltalinaed dagiti tropa nga Australian a maysa a mayor nga aliyado ti US iti Pacific, iti isla ti Panay iti kangitingitan ti Bagyo Tino. Linneppas daytoy ti makabulan a *war games* a Kasangga: 2025-02 idi Nobyembre 7 iti Camp Peralta idia Camindan, Capiz.

Iti Bagyo Uwan, nagparang ti presensya dagiti pwersa nga Amerikano iti Amyanan a Luzon nu sadinno a mairusruswat met ti 10-aldaw a Joint Exercise (AJEX) Dagat, Langit at Lupat (DAGITPA) ti AFP. Saan

a naparang a nakipaset ti US ditoy a panagsanay. Nupay kasta, daytoy a panagsanay ket paset ti itantandudo ti US a panagsagana ken panangkariit iti gera iti karibal daytoy nga imperyalista a China. Mismo a ti hepe ti AFP ti nagdeklara a daytoy ket panagsagana "amangan nu rauten (ti China) ti Taiwan." Napilitan ti AFP nga isardeng pay ti panagsanay tapno agiyaramid ti HADR, kadwa dagiti tropa ti US, iti sumagmamano a paset iti Luzon.

Nagtalinaed met dagiti barko a

panggubat ti US iti teritoryo a pangbaybay ti Pilipinas iti daytoy a panawen. Idi Nobyembre 14-15, inruswat daytoy ti maika-13 a Multilateral Maritime Cooperative Activity, kabilang ti Japan ken ti Philippine Navy iti umuna a gundaway. Nagmaniobra dagitoy laban kadagiti barko a Chinese asideg ti Scarborough Shoal.

Idia Alamada, North Cotabato, naisayangkat ti maysa a saan a nainpablaak iti publiko a panagsanay militar idi Nobyembre 11-14. Kadagitoy nga aldaw, inanusan dagiti residente ti agmalmalem nga awan sarday a panagpappaputok ti nadumaduma a klase ti armas. Inyulat da ti presensya dagiti gangannaet a tropa a nagserberbi nga instruktur iti panagsanay kadagiti maniobra a kombatan kadagiti taltalon ken sityo da. **AB**

Panangsalaknib iti daga ken dangadang nga anti-pyudal idiay Isabela

Iti sango ti adu a karit, agtultuloy ti uppat a laban dagiti mannalon para iti karbengan da iti daga idiay Isabela. Manipud 2019, nangiruswat da kadagiti kampuhan, bungkalan, dagiti dayalogo, petisyon ken kumprontasyon laban iti apo't daga ken kadagiti ahensya ti gubyrerno.

Iti sentral nga Isabela, dua a komunidad dagiti mannalon ti lumablaba para iti karbengan da iti *homestead*. Ti erya ket makamkamkam tapno agbalin a paset ti nalawlaw nga *agro-industrial zone* a maar-aramat para iti dadakkel a *poultry*, bodega, plantasyon ti melon, unas ken dadduma pay.

Maysa kadagitoy nga erya ti nasurok 20 ektarya a *homestead* a kapagayan, kamaisan ken kamelonan a suksukayen ti 20 pamilya. Dagitoy a pamilya ket nasurok 40 tawenen a sigud a makitalalon a nagbalin a benepisyaryo ti reporma nga agraryo. Iti sangsangkamaysa a panagtignay, nasubbot da dagiti naagaw a katalalonan, napasardeng ti panagilako iti daga ken napasardeng ti panagsingir ti abang. Napasardeng da met ti panangriri-buk ken panagbalay-balay dagiti pulis ken militar.

Iti maysa pay nga ili, lumablaba dagiti mannalon para iti nasurok 20 ektarya a *homestead* a kapagayan, kamaisan ken kanatengan. Ti daga ket suksukayen ti 17 pamilya a mannalon a 50 tawenen a makitalalon iti lugar. Idi 2021, kellaat a nagpakita iti lugar ti kabagyan ti apo't daga nga addaan peke a "reconstituted" wenno balbaliw a nabukel a titulo ken ag-agawen na ti daga. Manipud idi ket aktibo a lumablaba dagiti mannalon para iti karbengan da iti daga, iti laksid ti panagtubeng ken panaglabsing iti karbengan-*tao*.

Iti abagatan nga Isabela, agtultuloy ti panang-

salaknib dagiti mannalon iti karbengan da nga agsukay iti dua nga erya. Dagiti mannalon a maag-agawan ti daga ket makatalalinaed ken disimulado a makapagsuksukay para iti konsumo ken pagbiagan da iti makamkamkam a dandani 70 ektarya a daga ti maysa a kumpanya iti minas. Iti maysa pay nga ili, lablabanan dagiti mannalon ti panangtagikwa iti 50 ektarya a daga iti linged ti National Greening Program ti gubyrerno.

Tulbek ti pangpulitika nga innadal iti panangingato ti militansya

Iti napalabas nga innem a tawen, dakkel ti inakem dagiti pangpulitika nga innadal tapno ingato ti militansya ken patibkeren ti pakinakem dagiti mannalon iti panaglaban da. Nagbalin daytoy nga epektibo a kalasag da iti rungsot dagiti apo't daga ken pwersa ti Armed Forces of the Philippines ken Philippine National Police.

Iti uppat a kampanya iti Isabela, masigsigurado ti panangited kadagitoy pangpulitika a panagadal iti nadumaduma a tukad ti panagtignay dagiti mannalon. Iyan-annatup da dagiti diskusyon iti partikular a kasasaad, panagbaliw ti sitwasyon ken

isayangkat a kolektibo a tignay.

Binukel ken inadal da ti dokumento ti kampanya kanaig ti masangsango a panagkamkam iti daga. Inadal da ti ligal a sasaaden dagiti mannalon, ti pakasaritaan ti daga ken ti karbengan da ditoy. Insilpo da daytoy iti kabuklan a dangadang ti dasig a mannalon iti panangtalanantian iti dangadang para iti pudno a reporma iti daga.

Kagiddan ti pannakabuangay dagiti timpuyog ti mannalon, natalantan ti oryentasyon dagiti organisasyon da. Nakapagtalanantian da met kadagitoy isyu ti nalabes nga importasyon ti bagas, panagitakder ti base militar ti US iti rehiyon iti bileg ti Enhanced Defense Cooperation Agreement ken dadduma pay nga isyu ti umili tunggal dumar-ay da kadagitoy rali.

Pormal met nga agad-adal da ti Ababa a Kurso iti Gimong ken Rebolusyon a Pilipino ken Espesyal a Kurso ti Masa. Iti panaguneg ti rebolusyonaryo a kamulatan da, tinalantan da ti rebolusyonaryo nga oryentasyon ken rebbengen ti Pambansang Katipunan ng mga Magbubukid. Iti sumagmamano a gundaway, nagtalanantian da met ti Ang Bayan.

Nagbalin met a nalatak ti panagadal dagiti mannalon iti kasasaad ti karbengan-*tao* ken panaglaban iti kampanya a panagpasuko dagiti pulis, militar ken National Task Force-Elcac. Inaramat da daytoy a kalasag iti awan sarday a panagatake iti panagkaykaysa da ken gandat nga idiskaril ti laban da iti daga. Timmakder dagiti komunidad laban iti pammutbuteng ken panangallilaw dagiti traydor a "dati a rebelde."

"Kasapulan nga ituloy dagiti innadal iti dadduma pay a kameng da nangruna ta rumangranggas ken rumigrigat ti lokal a dangadang da iti daga," segun iti ulat dagiti organisador.



Organisador ti mannalon idiay Isabela, naaresto

Kinundenar ti Karapatan-Cagayan Valley ti ilegal a panangkemmeg ken Stalin Valencia, maysa nga organisador ti mannalon. Kinemmeg ti pinagtipon a pwersa ti Philippine National Police (PNP) ken 5th ID ni Valencia idi Nobyembre 15 idiay San Mateo, Isabela. Sumangsango isuna ti agtutuon a kaso a kriminal, kabilang ti napaay a pammapatay, pammapatay ken panagpuor iti Cagayan Valley.

Agpatpatnag a saan a naiparang ni Valencia, ken napaidaman a makita ti pamilya ken ti pinili na nga abogado. Nagdanag da a naipasidong isuna iti interrogasyon ken sikolohikal a panagparigat.

Idiay Negros, agsasaruno ti nailista a kaskaso ti panaglabsing iti karbengan-*tao* manipud Oktubre 28 agingga Nobyembre 4.

Panagaresto. Kinemmeg dagiti soldado ti 94th IB ti katutubo a ni Anoy Pacheco bayat nga ap-apan iti talon na idiay Sityo Tigbao, Barangay Buenavista, Himamaylan City idi Nobyembre 4. Ni Pacheco ket anak ti maysa a "Kalanyan" wenno lider katutubo iti lugar da a Tribu Magahat-Bukidnon.

Panaghalughog. Idi Oktubre 28, pwersado a sinerrek ken rinansak dagiti soldado ti balay ti mannalon a ni Remy Villacanao. Kasaruno daytoy ket dinarup ken pinalikmutan dagiti soldado ti balay ni Chona Martinez, asawa ken kabsat dagiti biktima ti pulitikal a pammapatay ti militar.

Idiay Laguna, sumangsango iti pangta a demolisyon ti komunidad ti nakurapay iti NIA Road Purok 7 idiay Barangay Pooc, Sta. Rosa, Laguna. Ti demolisyon ket makunkuna a mangted-dalan iti *road concreting project* ti ahensya. Naituding a maiyaramid daytoy manipud Nobyembre 18.

AB

Aset a sangkot iti pammapatay ken Ka Juanito Magbanua, napatay

NAPATAY TI NEW People's Army (NPA)-South Central Negros (Romeo Nanta Command) ti aset ti intel ti 94th IB a ni Jomy Pelarta iti insayangkat daytoy nga armado nga aksyon idi Nobyembre 6 ti rabii idiay Sityo Sig-ang, Barangay Carabalan, Himamaylan City, Negros Occidental. Ni Pelarta ket sangkot iti pammapatay iti *hors de combat* a tagapagsarita ti NPA-Negros Island a ni Ka Juanito Magbanua (Romeo Nanta) idi 2022.

Ni Pelarta ti nagitudo iti lokasyon ni Ka Juanito iti Sityo Medel. Kinemmeg, tinortyur ken ingagara a pinapatay dagiti soldado ti tagapagsarita a *naka-medical leave*. Kalpasan daytoy, pinarwar da a napapatay isuna iti maysa nga armado nga engkwentro. Imbwelto met ni Pelarta iti panangpaurat iti yunit ti NPA mano aldaw sakbay nga inpatiliw na ni Ka Juanito. Karaman met ni Pelarta iti dua a kaso ti panagrames ken gandat a panagrames.

Armado a risiris ken henosidyo idiay Sudan, gubway ti imperyalista a proxy war

Agtultuloy a nakaidasay iti riribuk ti Sudan manipud idi bimtak ti gubat iti baet ti Sudanese Armed Forces (SAF) ken Rapid Support Forces (RSF) idi 2023. Nasuroken 150,000 katao ti napatay iti gera, ken minilyon pay ti napilitan a pimmanaw.

Adda iti 25 milyon a Sudanese ti agsagsagaba ti napalalo a kinakurang iti taraon. Ti pagilyan ket maysa kadagiti agsagsagaba ti kakarwan a krisis iti panagbisin iti sangalubongan.

Segun iti International League of Peoples' Struggle (ILPS), saan a simple a risiris dagiti lokal a pwersa ti mapaspasamak idiay Sudan. Maki-bibiang ditoy ti US tapno kontrolen saan laeng ti guberno ti Sudan nu di ket uray ti kinabaknang a mineral ti pagilyan.

Pagpallaloten ti US ti RSF ken SAF babaen kadagiti alyado daytoy

iti Middle East. Kabadang daytoy ti Mossad, ahensya a paniktik ti Zionista nga Israel, iti panangsanay iti RSF. Pagbetbettaken ti US ti risiris tapno pakapsuten ti panagkaykaysa dagiti pagilyan nga African ken Arab ken pagtalinaeden ti kontrol daytoy iti natural a kinabaknang ti rehiyon, nangruna ti balitok ken langis. Pinalubosan met ti US dagiti aso-aso na iti Middle East a makinabang iti linnakuan ti armas iti agsumbangir a benneg.

Makita ditoy a ti US ti kangrunangan nga addaan sungsubangan iti

krisis ken tukad- henosidyo a kinarangas idiay Sudan, segun iti ILPS.

"Ti krisis iti Sudan ket repleksyon dagiti immuna nga imperyalista nga interbensyon iti Iraq, Libya ken Syria," kuna daytoy. Daytoy ket kapada dagiti gubat a nairuswat iti nagan ti demokrasya ngem ti kinapudno ket para iti interes ti US ken dagiti alyado daytoy a pagilyan. Daytoy ket paset met ti nalawlaw a kampanya ti US ken dagiti alyado da tapno gudwaen ken kontrolen dagiti pagilyan iti Africa ken West Asia. Karaman ditoy dagiti gera iti Democratic Republic of the Congo ken ti panagraut iti Yemen ken Palestine, nga amin ket umat-atake iti karbengan dagiti umili iti bukod a panggeddeng.

AB